




職方典第一千六十四卷

建寧府部藝文二

詩

仙陽亭

攀淚訪亭侯茲地乃閩城萬古通漢使千載連吳兵瑤磯躋翠銅山鬱縱橫方水埋金腰圓阜伏丹瓊下視雄虹照俯看綵霞明桂枝空命折煙氣坐自驚劍逕差前檢岷山慙舊名伊我從霜露僕御復孤征楚客心命絕一願聞越聲

度泉嶠

前人

岑峯蔽日元左右信艱哉萬壑共馳驚百谷爭往來鷹隼旣厲翼蛟魚亦曝鱗崩壁迭枕臥巔石屢盤迴伏波未能鑿樓船不敢開百年積流水千載生青苔行行距半景予馬以長懷南方天炎火魂兮可歸來

永安寺

唐歐陽詹

結得蒲團不掃塵松間冥坐共何人林深日午鐘聲動自採溪毛養幻身

梨嶺

前人

南北風烟卽異方連峯危棧倚蒼蒼哀猿咽木傍高處誰不沾衣望故鄉

遊西山

宋蔡沈

紫荊相依倚綠條自蒙密秋蘭澗中花山菓路邊實沿岡引霜藤臨流坐寒石日暮陰崖開雲收遠山出疎籬尙存菊荒徑庭垂橘絲桐想虛堂簡策見靜室俯仰今幾時漫然已陳迹摩挲蒼苔痕展齒不可識

登蘆峯

朱熹

蘆山一何高上上不可盡我行獨忘疲泉石有招引須臾出蒙密矯首眺無畛已謂極崢嶸仰視猶隱嶙新齋小休憩餘力更勉隄東峯切霄漢首夏正淒緊杖策同攀躋極目散幽窘萬里俯連環千重瞰孤隼因知平生懷未與塵慮混歸塗采薇蕨晚餉雜蔬筍笑謂同來人此願天所允獨往會淹留寒棲甘菌蠡山阿子慕予無愛勒回軫

觀西山懷嶽麓

前人

風月平生意江湖自在身年華供轉徙眼界得清新試問西山雨何如湘水春悠然一長嘯妙絕特無倫

雲谷

前人

寒雲無四時散漫此山谷幸乏霖雨姿何妨媚幽獨

南澗

前人

危石下崢嶸高林上蒼翠中有橫飛泉崩奔雜奇麗

瀑布

前人

峯迴危逕轉垂練忽千尋不爲登仙倦躊躇秋澗陰

雲關

前人

白雲去復還黃塵到難入只有澗水聲出關流更急

蓮沼

前人

亭亭玉芙蓉迴立映澄碧只愁山月明照作寒露滴

杉逕

前人

南起雲關口縈紆上草堂天風發清嶺山月度寒光

雲莊

前人

小丘橫翠几層嶂復嵯峨釋耒閑來看巖姿此處多

泉峽

前人

入關但平田復得此清響何必問仙源神襟一蕭爽

石池

前人

兩崖蒼峭石護此碧泓寒秋月來窺影驪珠吐玉盤

山楹

前人

山楹一悵望恨此雲迷谷仙人不可期縹緲雙髻綠

藥圃

前人

長鑱劬靈根時此泉下圃妙劑未須論丹萸已堪煮

井泉

前人

山高澤氣通石竇飛靈液默料谷中雲多應從此出

西寮

前人

畚田種胡麻結草寄林樾珍重無心人寒棲弄明月

晦庵

前人

憶昔屏山翁示我一言教自信久未能巖棲冀微效

草廬

前人

青山繞蓬廬白雲障幽戶卒歲聊自娛時人莫留顧

揮手

前人

山臺一揮手從此斷將迎不見塵中事惟聞打麥聲

雲社

前人

自作山中人卽與雲爲友一笑雨紛紛無勞三奠酒

懷仙

前人

西望多奇峯北瞰獨仙府欲致武夷君石壇羅桂醕

桃蹊

前人

澗裏春泉響種桃泉山頭爛紅紛委地未肯出山流

竹塢

前人

峭蒨桃蹊北蕭森竹塢陰不堪秋夜永風雨助悲吟

漆園

前人

舊聞南華仙作吏漆園裏因悟見割憂嗒然空隱几

茶坂

前人

攜簾北嶺西采擷香茗飲一啜夜心寒跣趺謝衾枕

絕頂

前人

當年赫曦臺移治在茲嶺寥廓無四鄰三光疑倒影

北澗

前人

土斷川亦分北下成陰澗秀石得佳名服膺吾敢慢

中溪

前人

南下東嶺阿云是中溪道岩樹愛樛枝石田悲蔓草

休庵

前人

別嶺有精廬林巒亦幽絕無事一往來茶瓜不須設

芹溪九曲

九首

前人

一曲移舟採澗芹市聲只隔一江雲沙頭喚渡人歸晚回首蘆峯月一輪 二曲溪邊萬木林水環

竹石四時清漁歌櫂入斜陽裏隔岸時聞一兩聲 三曲舟行龍虎灘推篷把酒見南山回頭檢點

仙蹤跡萬頃白雲時自閑 四曲烟雲鎖小樓寺臨喬木古溪頭僧歸林下柴門靜麋鹿銜花自在

遊 五曲峯巒列翠屏白雲深處隱仙亭子期一去無消息惟有喬松萬古青 六曲溪環處士家

鼓樓岩下樹槎枒潭空龍去名常在時見平汀湧白沙 七曲靈祠瞰水濱聚魚石上躍金鱗林四

路入桃源近時有漁郎來問津
八曲硯峯倚碧虛泉流瀑布世間無憑誰染就丹青寫出芹溪
九曲圖 九曲悠悠景最幽巉巖石峽束寒流源深自是舟難到更有龍池在上頭

游南陽菴

明柳汝霖

風落細桃泛碧灣似隨流水武陵間春山有色新鶯巧野寺無塵老衲閒飛翠疊雲移竹影垂紅麗
日醉花顏遊餘唱咏狂曾慙夕露橫溪弄月還

集登高山

徐文炳

大潭山上綠氤氲山下詞人買屐紛霧鎖天南豹舄隱煙籠郭北日難分千秋兵氣隨流歇一曲漁
歌夾岸聞無限滄桑慵極目鴈聲嘹唳度春雲

建寧府部紀事

府志唐高祖武德四年妖賊武遇陷建州五年刺史謝元治討平之州復僖宗乾符五年賊黃巢毀
州治州人陳巖率兵破之 王延政審知子也天福六年延政請於曦欲以建州爲威武軍自爲
節度使曦以建州爲鎮安軍延政爲節度使封富沙王延政改鎮安爲鎮武延政數與曦治兵相攻

判官潘承祐屢諫不從。曦使者至延政語悖慢。承祐長跪切諫。延政怒。顧謂左右曰：「判官之肉可食乎？」承祐不顧。聲色愈厲。八年延政建國。稱殷。改元天德。以承祐爲吏部尙書。楊思恭爲兵部尙書。同平章事。時國小民貧。軍旅不息。思恭增田畝山澤之稅。至於魚鹽蔬果。無不倍征。國人謂之楊剝皮。承祐上書陳十事。言甚切直。延政大怒。削其官爵。勒歸私第。開運元年朱文進等作亂。延政遣吳成義帥艦千艘討文進。唐聞亂。遂發兵攻之。成義聞有唐兵。詐福州吏民曰：「唐助我討賊。大兵今至矣。」福人益懼。南廊承旨林仁翰謂其徒曰：「吾曹世事王氏。今授職賊臣。富沙王至何面目見之？」師三千人趨重遇第。斬其首示衆。曰：「重遇已死。何不亟取文進以贖罪。」衆踴躍從之。遂斬文進。迎成義入城。傳二首於建州。二年閩之故臣共請延政歸福州。改國號曰閩。延政以方有唐兵。未暇徙都。以從子繼昌鎮福州。而令指揮使王仁諷將兵衛之。賞仁翰甚薄。仁翰未嘗自言其功。發兩軍甲士萬千五人詣建州。以拒唐。初光州人李仁達浦城人陳繼珣俱叛延政奔福州。至是二人不自安。說仁諷殺繼昌及成義。仁達欲自立。恐衆心未服。以雪峯寺僧卓巖明素爲衆所重。相與迎之。立以爲帝。延政聞之。族仁諷。家命統軍張漢真將水軍會漳州。兵討之。真至福州。仁諷聞其家夷滅。開門力戰。執漢

真斬之巖明無他方略但於殿上噴水散豆作諸法事而已仁達自判六軍諸衛事使仁諷屯西門繼珣屯北門仁諷從容謂繼珣曰人之所以爲人以有忠信仁義也吾叛富沙非忠人以從子託我而與人殺之非信屬者與建兵戰所殺皆鄉曲故人非仁棄妻子使人魚肉之非義此身十沉九浮死有餘媿因拊痛哭繼珣曰大丈夫殉名利何顧妻子宜置此事勿以取禍仁達聞而殺之由是兵權盡歸仁達仁達乃自稱威武留後奉表稱藩于唐亦遣使入貢於晉唐以仁達爲節度或告延政福州援兵謀叛延政收其鎧仗兵殺之死者八千餘人脯其肉以歸爲食唐兵圍建州旣久建人離心或謂董思安盍早擇去就思安曰吾世事王氏危而叛之天下其誰容我衆感其言無叛者唐拔建州延政降思安整衆奔泉州三年唐兵攻福州克其外郭仁達固守築二城遣使求救於吳越吳越發兵救之明年吳越反唐兵取福州殺達夷其族

方偕知建陽縣縣產茶每歲先社日調民數千鼓譟山旁以達陽氣偕以爲害農奏罷之

包恢知建寧閩俗以九月祀五王生日靡金帛傾市奉之恢曰彼非犬豕安得一日而五子同生非不祥者乎而尊畏之若是衆感悟爲之衰止

宋高宗建炎元年建州軍校張員等作亂殺守臣擒轉運使毛奎判官曹仔嬰城自守二年轉運判

官謝如意討張員等六人誅之是年六月建州卒葉儂等作亂寇福州陷之七月入寧德縣復還建州命御營中軍統制張俊同兩浙提點刑獄趙哲率兵討之十二月哲大破儂兵於建州城下儂遁而降復謀爲變張俊擒斬之

三年四月以韓世忠爲江浙制置使討苗傅劉正彥於浦城縣獲正彥傅遁走其裨將江池殺苗翊降於周望傅走建陽縣土豪詹標執之以獻

四年三月建州

范汝爲作亂知州事劉子翼移寓崇安先是范汝爲作亂命統制李捧捕之後命福建安撫使程邁會兵討之捧擊汝爲於建州官軍皆潰捧遁去十月遣前御史臺檢法官謝嚮招汝爲十月復命神武副軍都統制辛企宗討之十二月汝爲降詔補民兵統領紹興元年正月謝嚮率汝爲討平建陽山寇劉時舉二月以辛企宗爲福建制置使詔企宗及嚮罷遣汝爲兵汝爲不聽命六月崇安民廖公昭合汝爲餘黨熊志寧作亂既散志寧復與建陽丁朝佐合兵陷二縣八月移軍福州討志寧及江諸賊尋遣御史胡世將督捕十月汝爲復叛入建州守臣王浚民棄城走企宗退屯福州十一月以孟庾爲福建江西荆湖宣撫使神武右軍都統制副之二年正月世忠兵至建州直抵鳳凰山五月破之汝爲自焚死斬其二弟及附賊者餘黨悉平世宗初欲盡誅建民李綱在福州馳至救止之

建民以全

八閩通志景定五年九月建寧府教授謝枋得校文宣城及建康漕闢發策十餘問言權奸誤國趙氏必亡左司諫舒有開劾其怨望騰謗大不敬竄興國軍

德祐元年賈似道謫建州居住翁合上言建寧實朱熹講道之闕里雖三尺童子亦知向方聞似道名咸欲嘔唾況見其面乎乞達投荒昧以禦魑魅遂責授高州團練副使循州安置籍其家遣使監押貶所會稽縣尉鄭虎臣以其父嘗爲似道所配欲報之忻然請行似道時寓建寧之開元寺侍妾尙數十人虎臣至悉屏去撤輜蓋暴行秋日中令舁輜夫唱杭州歌謠之每名斥似道窘辱備至舟次南劍州黯淡灘虎臣曰水清其何不死於此似道曰太皇許我不死候有詔卽死一日入古寺壁上有吳潛南行所題字虎臣呼似道曰吳丞相何以至此似道慚不能對至泉州洛陽橋遇葉李自漳州放還李賦詞贈之似道俯首謝焉十月至漳州木綿庵虎臣曰吾爲天下殺似道雖死何憾遂拘其子與妾別館卽厠上拉脅殺之

府志端平元年四月建陽縣盜發衆數千人焚劫邵武麻沙長平詔殿司選精銳千人命統制婁拱

統領楊辛討捕之七月權邵武軍王瑩以平陽寇有功官兩轉餘推賞有差

元至元二十年十月建甯路管軍總管黃華叛衆幾十萬號頭陀軍僞稱宋祥興五年犯崇安浦城等縣圍建甯府詔卜鄰吉帶史弼等將兵二萬二千人討之二十一年正月華自殺

元史鄒伯顏傳伯顏字從吉高唐人爲建甯崇安縣尹崇安之爲邑區別其土田名之曰都者五十都之田上送官者爲糧六千石其大家以五十餘家而兼五千石細民以四百餘家而合一千石大家之田連跨數都而細民之糧或僅升合有司常以四百之細民配五十大家之役故貧者受役旬日而家已破伯顏曰貧弱之受困一至此乎乃取其糧籍而分計從有糧一石者授一石之役有糧升斗者受升斗之役田多者受數都之役而不可辭田少者稱其所出而無倖免因無告之民始得休息崇安賦役之均遂爲四方最邑有宋趙抃所鑿溝漑民田數千畝歲久溝湮而田廢伯顏修長溝十里繞楓樹陂累石以爲固溝悉復抃遺跡而田爲常稔民賴其利

府志嘉靖四十年八月流賊夜突至城西時承平久民不知兵平明逆戰於通都橋敗績始焚橋禦之城守七日賊解圍去會叅將戚繼光督兵兼程追之盡殲焉戚公與兵憲豪飲三鼓未罷而辰刻

破賊會食人以爲神又叛卒袁三黃鳳自信州殺掠斬關入建陽焚廬舍橋梁民死無算更流賊屯松溪城東賊每戰輒麾大旗如魚網縑布爲之邊綴鉤芒如刺松兵逆戰以笄手開陣火藥隨之賊旗一麾笄鉤相錯火焚其旗賊敗燒營夜遁 四十一年十一月十七日倭寇攻陷壽甯焚掠不

可勝數四十二年正月本縣山賊劉大眼等乘機起剽掠諸村落十二月倭寇屠壽寧政和二縣松溪戒嚴縣令懼獻金請和寇答書悖慢松人陳春壽大憤懸軍令議和者斬倭至河東松人方明惠伏弩殺其渠魁三人倭抵城下松兵前哨出戰敗之斬首十餘級倭少挫次日攻圍八門三晝夜倭持鳥銃而松善弩技倍之寇無所施乃佯解去散掠諸村暗造雲車雲梯衝城梯之制高僅及堞眼上覆牛皮以蔽矢車制高出堞上分三層一車可容百人四面蔽以牛皮僅開鏡眼窺城上先是倭退時松人遽解嚴唯諸生陳桂范茂先黃澹等知倭狡計力言不可忘備令惑於奸細往持金酒往犒張筵河上飲之扮游兵爲令陪於東門三聖祠倭望見令左右有金甲三大將蓋石鹿皂箋神也席罷酬刀一柄忽有被掠二童子及倪繼六者隔溪倭狡計於是陳春金長唐葉暄葉集魏鏘葉樸等泣言於令始捕奸細引出斬之春等傾家財以餉士未幾雲車雲梯至倭舞劍雙飛梯而上守兵

懼散力士張德奮勇揮斧斬倭首落城下李士清朱蓬毛各殺數倭衆始定矢石銃弩齊發車梯俱碎相持一月次年正月十五日倭空營出松人伏兵四起或伏草中發銃或設伏弩或藏地鉤釘板倭死甚衆自是不敢復渡河有馳倭營奪其牛角過河吹之賊營擾亂自相攻殺次日督兵二哨出東門擊之又張疑兵爲襲營狀賊大潰遁去松人尾其後一鼓而進倭無噍類

萬曆二十七年七月十六日建安鄉人吳順潘應選等感降五穀童聚衆於郡之鐘樓巷爲游徼所偵始解散時建陽縣民程覺立亦以左道惑衆捕下獄死仍暴其屍三日 三十二年三月甌甯謝屯鄉民吳建等持古佛號集黨千餘漸事剽掠一郡戒嚴壽甯知縣霍騰蛟時視掾甌甯以單騎往曉之會督府亦遣材官齎牌傳諭竟不解於是兵憲劉毅檄鄉民得便宜擒勦仍發兵屯大厝口官兵未至兵先搗其穴建自殺其黨驚懼亦自殺屍壘如山仍傳建首詣郡中霍公南海人文懿公韜之後也

建寧府部雜錄

八閩通志南唐張陳二將者閩太傅章氏之愛將也後奔南唐南唐主命查文徽征閩以二將爲副

屯軍於五夫里有吳翁者善卜二將召翁占之曰吉未幾王延政降二將同文徽歸復次五夫因召翁與語資遺甚厚翁辭焉二將曰不意有大賢居此因名其山曰居賢謂翁曰吾欲棄人事與翁爲林泉交可乎翁乃爲大將卜居隱仙巖之旁今日大將村爲小將卜居於賢山之側今日小將村其駐馬之地曰馬鞍山埋鼓角之地曰鼓角峯藏刀劍之地曰劍山棄旗鼓之地曰鼓亭一日文徽辭二將餞之於鵝山之陽文徽顧巖石奇磊登巖長嘯聲出金石後人因名其巖曰將軍二將從翁學長生之道百餘歲而卒 章子厚初生時父母欲不育浸於水盆後復育之長工詩文爲時所重

出湖州嘗以詩寄東坡坡用其韻和二首二首云方丈仙人出渺茫高情猶愛水雲鄉功名誰使連三捷身世何緣得兩忘早歲歸休心共在他年相見話偏長只應未報君恩重清夢時時到玉堂絳闕雲臺總有名應須極貴又長生鼎中龍虎黃金賤松下龜蛇綠骨輕雪水未渾纓可濯弁峯初見眼應明兩卮春酒真堪羨獨占人間分外榮此二詩甚佳前詩言其出渺茫而終貴顯後詩言其好爐火而餌茯苓皆善謔也子厚得詩不樂數日章才邵性喜賦詩嘗題巖子陵釣臺有云短棹夷猶七里灘人亡依舊水光寒漢家名節君知否盡在先生一釣竿時以爲佳作 京師景德寺僧房